



PALA GRUPA KOJA JE ORGANIZOVANO KRIJUMČARILA REZANI DUVAN U BiH

Više od deset uhapšenih, zaplijenjene tone duvana

N. TADIĆ

TUZLA - Službenici Uprave za indirektno oporezivanje (UIO) BiH u saradnji s pripadnicima SIPA pokrenuli su rano juče zajedničku akciju kodnog naziva "List 1" u cilju suzbijanja nelegalnog prometa duvana u zemlji.

Kako je saopšteno iz SIPA, uhapšeni su S.K., N.K., N.R., M.M., V.P. i D.Z., još nekoliko osoba je privedeno i saslušano, a oduzeto je oko 10 tona duvana u listu.

Prema prikupljenim dokazima, osumnjičena organizovana grupa u periodu od marta do oktobra ove godine izvršila je krijumčarenje i rasparčavanje radi dalje prodaje više tona rezanog duvana. Na ovaj duvan nisu plaćeni porez ni akcize, a prodavan je na više lokacija u BiH. Time je budžet BiH oštećen za iznos od



oko 1,2 miliona KM.

Nelegalna trgovina funkcionisala je tako da je prvoosumnjičeni kupovao duvan u listu, organizovao njegovo rezanje, preradu i pakovanje u različitim količinama, a potom prodavao

**BUDŽET BIH OŠTEĆEN
JE ZA 1,2 MILIONA KM
JER JE DIO DUVANA
VEĆ STAVLJEN
U PROMET**

posrednicima koji su rezani duvan plasirali na tržište.

Tokom istrage prikupljeni su dokazi da su osumnjičeni pribavili alat i opremu za rezanje i prepakiranje duvana te vršili njegov prevoz, krijumčarenje i prodaju

na više lokacija diljem Bosne i Hercegovine. Osim toga, krijumčarili su ga i prodavali na području Hrvatske, te je u ovom predmetu ostvarena značajna saradnja s pravosuđem i policijom Hrvatske.

"Budžet BiH oštećen je za 1,2 miliona KM jer je dio duvana već stavljen u promet", izjavio je na konferenciji za medije Ratko Kovačević, portparol UIO BiH.

Mehmedalija Osmić, šef Odsjeka za provedbu propisa UIO u Regionalnom centru Tuzla, rekao je da su u akciji, koja je pripremana više mjeseci, učestvovali desetine službenika SIPA, UIO, policija iz Tuzlanskog kantona i Republike Srpske. Po njegovim riječima, među uhapšenima su i nezaposlene osobe, a koje imaju po nekoliko automobila.

"Našli smo sredstva i mašine za sjeckanje duhana. Akcize za jedan kilogram usitnjenog lista duhana iznose 90-100 KM, pa možete izračunati koliko je to novca kada je u pitanju 10 tona duhana", rekao je Osmić.

Prema prikupljenim dokazima izvršeno je krijumčarenje i prodaja najmanje 15 tona rezanog duhana, čime su počinioci pribavili znatnu nezakonitu imovinsku korist.